

NAQQIUT

Taarserpaa akissuteqaat 22. Januari 2026-meersoq

(Ilinniartitaanermut Kultureqarnermut Timersornermut Ilageeqarnermullu Naalakkersuisup taaguutaa annikitsumik naqqinneqarpoq.)

Inuiattut erinarsuutitsinni marluusuni sorleq pisortatigoortumik atorineqassanersoq nutaamilluunniit taarserneqartariaqarnerseq pillugu apeqquteqaat aallaavingalugu oqallinnissamik siunnersuut.

(Inatsisartunut ilaasortaq, Aqqalu C Jerimiassen, Atassut)

Akissuteqaat

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarnera

Inatsisartunut ilaasortaq Aqqalu C. Jerimiassen, Atassut, inuiattut erinarsuutigut pillugit, kiisalu erinarsuutip sorliup nunatsinnut pisortatigoortumik ilisarnaataasup ersarissumik nassuiarneqarnissaanut pisariaqartitsineq pillugu oqallisissiasamik siunnersuuteqarneranut Naalakkersuisut qutsavigaat. Kalaallisut inuiattut erinarsuuteqarnissarput pillugu apeqqut Inatsisartut ataatsimiinneranni arlaleriarlugu oqallisigineqartarpoq; 1979, 1990, 1992, 1994, 2000, 2002, 2003 2017-imi aamma massakkut 2025-mi ukiakkut ataatsimiinnermi.

Inuiattut erinarsuutivut imatut taaguuteqartut tassaapput: "Nunarput utoqqarsuanngoravit" Henrik Lundip taalliaa Jonathan Petersenillu erinniaa aamma "Nuna asiilasooq" Jonathan Petersenip taalliaralugulu erinniaa. Siullertut taaneqartoq 1916-imi inuiattut erinarsuutit atorineqalerpoq, kingullerlu 1979-imi. Siullermik "Nunarput utoqqarsuanngoravit" Sverigemiut inuiattut erinarsuutaannik "Du gamla, du fria, du fjällhöga Nord"-imik erinaqqaarsimavoq. Jonathan Petersenip kingorna erinnerpaa.

Eqqortuuvoq "Nunarput utoqqarsuanngoravit" aamma "Nuna asiilasooq" inuiattut erinarsuutit atorineqartarneri, kiisalu aalajangerneqarnikuunani erinarsuut sorleq pisortatigoortumik atuutissanersoq. Erinarsuutitut taakkununga marluusunut tunngatillugu ileqqoriinnagassatut ittumik isumaqartoqalersimavoq, taamaalineranilu erinarsuutit taakku marluullutik inuiattut erinarsuutit isigineqalersimallutik. Taamaattorli inuiaqatigiinnut paatsuunganarsinnaavoq pisortatigut inuiattut erinarsuutit marluk akuerisaallutik atorineqartarmata. Taamatut marloqiusamik inissisimanerup erinarsuut sorleq pisortatigoortuunersoq pisortatigut aqqissuussinerni, inuiattut ullorsiornermi imaluunniit nunat tamalaat akornanni aallartitani nalornissutaasarluni. Inuiattut erinarsuut aamma meeqqanit siusissumik alanngaarlugu ilinniarneqartariaqarpoq, ataatsimoornermut inuiattullu kinaassutsimut ilisarnaataamat pingaarutilik.

Siunnersuuteqartumit iserfigineqarpoq nunami maani oqaatsit atorineqartut aammalu kalaallit oqaasiini sumiorpaluutit pingaarnert ilaatigut inuiattut erinarsuummi ilaatinneqarsinnaasut. Erinarsuummut siunnersuut, nunatsinni oqaatsit atorineqartut aammalu kalaallit oqaasiisa sumiorpaluutaannik pingaarnert ilaatillugit siunnersuutigineqartoq, isumassarsiornarpoq akuutitsinermik ataatsimoornermillu kissaateqarnermik takutitsisuulluni.

Allannguisoqassappat Naalakkersuisut isumaqarput sukumiisumik paasisitsiniaasoqartariaqartoq, peqatigiiffinnik susassaqtunik oqaloqatigiittoqarluni kiisalu innuttaasunik peqataatitsilluni. Inuiattut erinarsuummik aalajangiinermi ileqqunik atuinermillu aallaaveqartariaqarpoq innuttaasunillu amerlanernik isumaqatigineqarluni, misigissutsinut tunngasupilussuummat kinaassutsimullu aalajangiinermut tunngalluni.

Aaqqiissut tassaasinnaavoq innuttaasut erinarsuutit taakku marluk pioreersut pillugit innuttaasutut taasitinneqarnerisigut – imaluunniit erinarsuummik nutaarluinnarmik inuiattut ataatsimut erinarsuummik tikkuussisoqarluni. Taamatut suleriaaseqarnikkut tamat oqartussaaqataanerannik tunngaviusumik qulakkeerinnittuussaaq, innuttaasullu maani nunami kinaassutsimut paasinnittarnerannut inuiattullu ineriartornissamat takussutissiaassalluni pingaarutilik.

Taamatut Naalakkersuisut oqaaseqarlutik Inatsisartuni oqallittoqarluarnissaa kissaatigaat.